

MESYUARAT KEDUA, PENGGAJAL KEEMPAT  
PARLIMEN KEEMPAT BELAS  
2021

**HARI RABU : 27 OKTOBER 2021**

## **KANDUNGAN**

**JAWAPAN-JAWAPAN BAGI PERTANYAAN-PERTANYAAN JAWAB**

**LISAN YANG TIDAK DIJAWAB DI DALAM DEWAN**

**( SOALAN NO. 1, 11 HINGGA NO. 42 )**

**[SOALAN NO 1 DIJAWAB BERSEKALI DENGAN  
SOALAN NO 26]**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN YUSUF BIN ABD. WAHAB  
[ TANJONG MANIS ]**

**TARIKH : 27 OKTOBER 2021 ( RABU )**

**SOALAN**

**TUAN YUSUF BIN ABD. WAHAB [ TANJONG MANIS ]** minta **MENTERI PELANCONGAN, SENI DAN BUDAYA** menyatakan apakah perancangan untuk memperkenalkan *tourism bubble* ke negeri Sarawak, sebagaimana yang telah dimulakan di Pulau Langkawi.

**JAWAPAN**

**Tuan Yang di-Pertua,**

1. Sebelum saya meneruskan jawapan terhadap soalan oleh Yang Berhormat Tanjong Manis ini, saya memohon izin untuk menjawabnya bersekali dengan 14 soalan lain kerana menyentuh perkara yang sama, iaitu:

- Soalan nombor 26 oleh YB Bukit Bintang pada hari ini, 27 Oktober 2021;
- Soalan nombor 29 oleh Yang Berhormat Seputeh dan soalan nombor 34 oleh Yang Berhormat Tangga Batu bertarikh 2 November 2021;
- Soalan nombor 3 oleh Yang Berhormat Lenggong, soalan nombor 21 oleh Yang Berhormat Kemaman dan soalan nombor 34 oleh Yang Berhormat Port Dickson bertarikh 9 November 2021;
- Soalan nombor 7 oleh Yang Berhormat Machang dan soalan nombor 31 oleh Yang Berhormat Taiping bertarikh 15 November 2021;
- Soalan nombor 8 oleh Yang Berhormat Balik Pulau dan soalan nombor 9 oleh Yang Berhormat Pengerang bertarikh 30 November 2021;
- Soalan nombor 14 oleh Yang Berhormat Kepong bertarikh 6 Disember 2021;
- Soalan nombor 4 oleh Yang Berhormat Kota Melaka bertarikh 9 Disember 2021; serta

- Soalan nombor 4 oleh Yang Berhormat Kota Kinabalu dan soalan nombor 12 oleh Yang Berhormat Jerlun bertarikh 15 Disember 2021.

Tuan Yang di-Pertua,

2. Susulan penularan COVID-19 di seluruh dunia, Malaysia telah menutup sempadan antarabangnya sejak Mac 2020. Ditambah pula dengan pelaksanaan Perintah Kawalan Pergerakan (PKP) di seluruh negara, aktiviti sektor pelancongan negara menerima impak yang teruk. Situasi sukar sektor ini bukan hanya berlaku di Malaysia, malah di seluruh dunia.
3. Walaupun aktiviti sektor pelancongan terbatas, namun Kementerian Pelancongan, Seni dan Budaya (MOTAC) sentiasa meneroka segala peluang dan mempersiapkan penggiat industri untuk kembali aktif apabila ia dibenarkan beroperasi serta merancang untuk industri ini bangkit semula selaras dengan Pelan Pemulihan Negara.
4. Antara inisiatif besar yang dilaksanakan oleh MOTAC adalah memperkenalkan Gelembung Pelancongan Domestik Langkawi bermula 16 September 2021. Apa yang lebih istimewa adalah pembukaan semula Pulau Langkawi sebagai destinasi pelancongan domestik melalui projek rintis ini dilancarkan semasa larangan rentas negeri masih berkuatkuasa di seluruh negara.
5. Kami di MOTAC sebenarnya telah membangunkan perancangan untuk pembukaan lebih banyak gelembung perjalanan domestik secara berperingkat dan bersasar selepas Langkawi. Walaubagaimanapun, kita lebih gembira dengan pengumuman oleh Yang Amat Berhormat Perdana Menteri pada 10 Oktober 2021 berhubung kebenaran aktiviti rentas negeri hasil daripada kejayaan negara mencapai kadar vaksinasi 90 peratus populasi dewasa.

## **NO. SOALAN : 01**

6. Ini tentunya membawa khabar yang lebih baik kepada industri pelancongan negara kerana sebagai industri yang sangat bergantung kepada mobiliti atau pergerakan, kebenaran rentas negeri untuk tujuan pelancongan ini tidak lagi membataskan pergerakan dan destinasi pilihan yang terhad untuk rakyat Malaysia melancong di dalam negara.
7. Justeru, susulan pengumuman kebenaran rentas negeri tersebut, maka pada masa ini, tiada lagi keperluan untuk mewujudkan gelembung-gelembung pelancongan domestik yang lain.
8. Merujuk kepada Projek Rintis Gelembung Pelancongan Domestik di Pulau Langkawi, sukacita dimaklumkan bahawa bagi tempoh 16 September sehingga 15 Oktober 2021, Pulau Langkawi telah menerima kemasukan seramai lebih seratus ribu orang pelawat dari seluruh negara.
9. Kegiatan aktiviti pelancongan yang kembali aktif telah memberi impak positif bukan sahaja kepada entiti perniagaan pelancongan semata-mata, malah limpahan ekonomi hasil daripada aktiviti ini serta sektor rantai turut membawa perkembangan yang baik kepada masyarakat setempat.
10. Dalam menjayakan inisiatif projek rintis ini, SOP Gelembung Pelancongan Langkawi telah dibangunkan agar kita dapat mengurangkan risiko penularan wabak COVID-19 di kalangan pelancong dan juga penduduk tempatan Langkawi.
11. MOTAC bekerjasama dengan pelbagai kementerian dan agensi di bawah Kerajaan Pusat serta Negeri di bawah Jawatankuasa Koordinasi Penguatkuasaan dan Pematuhan SOP PKP COVID-19 (JKPS) yang diterajui oleh Kementerian Dalam Negeri dalam memastikan pematuhan SOP. Di samping itu, MOTAC juga sentiasa berinteraksi dengan persatuan dan penggiat industri, termasuklah penyedia premis penginapan dalam memastikan mereka tidak mengabaikan SOP dalam operasi mereka. Model yang sama juga digunakan untuk membudayakan norma baharu dan pematuhan SOP di kawasan pelancongan yang lain.

**NO. SOALAN : 01**

12. Sebagai langkah ke hadapan, MOTAC kini dalam fasa akhir melaksanakan persediaan untuk menyambut kembali ketibaan pelancong asing. Sebagai permulaan, Pulau Langkawi sekali lagi dipilih sebagai destinasi rintis, kali ini untuk Gelembung Pelancongan Antarabangsa pertama negara bermula 15 November 2021 nanti.

13. Projek Rintis Gelembung Pelancongan Antarabangsa Langkawi ini akan menjadi kayu pengukur kepada pembukaan lebih banyak Gelembung Perjalanan Antarabangsa ke destinasi-destinasi lain yang berpotensi berdasarkan penilaian sewajarnya oleh Majlis Keselamatan Negara dan Kementerian Kesihatan, sebelum dibawa kepada Jawatankuasa Khas Pengurusan Pandemik COVID-19 yang dipengerusikan oleh Yang Amat Berhormat Perdana Menteri untuk dipertimbangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KE-EMPAT  
PARLIMEN KE-EMPAT BELAS**

**PERTANYAAN : LISAN**

**DARIPADA : YB DATO' DR. MOHD KHAIRUDDIN BIN  
AMAN RAZALI ( KUALA NERUS )**

**TARIKH : 27 OKTOBER 2021 ( RABU )**

**SOALAN**

**DATO' DR. MOHD KHAIRUDDIN BIN AMAN RAZALI [KUALA NERUS]** minta **MENTERI PENGANGKUTAN** menyatakan status pembinaan Stesen Bas atau Gong Badak Central yang keperluannya sangat kritikal bagi menampung keperluan, keselamatan dan keselesaan khususnya mahasiswa/mahasiswi di Parlimen Kuala Nerus.

**JAWAPAN**

**Tuan Yang di-Pertua,**

Perancangan dan pembinaan Stesen Bas atau Gong Badak Central tidaklah terletak di bawah skop tanggungjawab atau dilaksanakan oleh Kementerian Pengangkutan (MOT). Perkara ini adalah terletak di bawah skop tanggungjawab Pihak Berkuasa Tempatan (PBT) ataupun Pihak Berkuasa Negeri (PBN) dalam aspek perancangan, pengawalan dan kelulusan pembinaannya.

Dalam hubungan ini, Kementerian Pengangkutan melalui Agensi Pengangkutan Awam Darat (APAD) akan menyediakan sokongan teknikal kepada pihak berkuasa yang berkenaan berhubung perancangan sistem pengangkutan awam darat termasuk aspek pembinaan stesen atau terminal bas awam. Perkara ini bagi memenuhi keperluan pengangkutan, keselamatan dan keselesaan penduduk setempat yang menggunakan perkhidmatan bas henti-henti di kawasan berkenaan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN JUNE LEOW HSIAD HUI  
[ HULU SELANGOR ]**

**TARIKH : 27 OKTOBER 2021 (RABU)**

**SOALAN**

Minta **MENTERI PENGAJIAN TINGGI** menyatakan statistik kes-kes yang melibatkan keselamatan mahasiswa dan mahasiswi di kampus serta pengkategorian berdasarkan negeri dan jenis universiti sama ada universiti awam dan swasta.

**JAWAPAN**

Tuan Yang di-Pertua,

Kementerian Pengajian Tinggi (KPT) amat prihatin dan sentiasa mengambil berat terhadap isu keselamatan dan kesejahteraan mahasiswa dengan mengamalkan prinsip '*zero tolerance*' terhadap faktor-faktor yang boleh menggugat atau menjejaskan keselamatan mahasiswa di kampus.

Sepanjang tahun 2020 dan sehingga September 2021, statistik Polis Diraja Malaysia (PDRM) menunjukkan sejumlah **55 kes jenayah kekerasan** telah berlaku di IPT melibatkan mahasiswa dan mahasiswi di kampus. Manakala bagi **kes jenayah harta benda pula sebanyak 241 kes direkodkan** masing-masing 154 kes pada tahun 2020 dan 87 kes pada tahun 2021. Kes-kes tangkapan oleh PDRM melibatkan pelajar IPT paling banyak berlaku di negeri Selangor bagi tahun 2020 dan 2021 dengan 17 rekod tangkapan melibatkan jenayah kekerasan dan 25 rekod tangkapan bagi jenayah harta benda pada tahun 2020; dan 23 rekod tangkapan melibatkan jenayah kekerasan serta 12 rekod tangkapan bagi jenayah harta benda pada tahun 2021.

Kes tangkapan oleh PDRM melibatkan pelajar IPT paling sedikit berlaku di negeri Perlis pada tahun 2020 dengan hanya dua (2) kes jenayah harta benda dilaporkan. Manakala bagi tahun 2021 pula, Kelantan, Negeri Sembilan, Perlis dan Sabah tidak mencatatkan sebarang kes tangkapan pelajar IPT oleh PDRM bagi jenayah kekerasan dan harta benda.

Sebagai langkah memastikan keselamatan pelajar IPT terjamin, Unit Keselamatan di setiap IPT berperanan untuk menjalankan tugas-tugas rondaan dan pemantauan secara berkala; penguatkuasaan arahan keselamatan; pemakluman langkah berjaga-jaga; membuat hebahan aktiviti berkaitan keselamatan kepada mahasiswa dari semasa ke semasa; dan menjadi pusat rujukan kepada pelajar berhubung isu keselamatan mereka.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN JUGAH ANAK MUYANG @ TAMBAT  
[ LUBOK ANTU ]**

**TARIKH : 27 OKTOBER 2021 ( RABU )**

**SOALAN**

**TUAN JUGAH ANAK MUYANG @ TAMBAT [ LUBOK ANTU ]** minta **MENTERI PELANCONGAN, SENI DAN BUDAYA** menyatakan dengan terperinci pelan yang bakal dilaksanakan terutamanya untuk menaikkan semula industri pelancongan di Lubok Antu yang pada suatu ketika dahulu merupakan satu destinasi pilihan dalam kalangan pelancong luar negara.

**JAWAPAN**

**Tuan Yang di-Pertua,**

1. Bagi memulih dan mengembalikan daya saing industri pelancongan negara, Kementerian Pelancongan, Seni dan Budaya (MOTAC) telah menggubal Dasar Pelancongan Negara (DPN) 2020-2030 yang merupakan agenda transformasi yang menumpukan pada usaha-usaha meningkatkan pendapatan negara, menggalakkan kerjasama dan pelaburan, memperkasa masyarakat setempat, mengukuhkan daya tahan dan kemampuan industri pelancongan negara serta kesediaan mengharungi bencana pada masa akan datang.
2. Menerusi DPN, segmen ekopelancongan telah menjadi salah satu fokus utama MOTAC terutamanya dalam merencanakan pelancongan domestik selaras dengan Pelan Ekopelancongan Kebangsaan (NEP) (2.0) 2020 – 2030 yang merangkumi strategi-strategi dan pelan tindakan bagi memastikan kelestarian produk ekopelancongan kekal mampan.
3. Menerusi pelan ini, MOTAC telah mengenalpasti kluster ekopelancongan Sri Aman - Batang Ai - Ulu Sungai Menyeng – Maludam di kawasan Parlimen Lubuk Antu, yang mempunyai pelbagai produk menarik, antaranya, Taman Negara Batang Ai, Wong Merah Lubok Antu, Lubok Kasai Nanga Sumpa, *Ensulai Waterfall* dan *Red Ape Trail* yang berpotensi dibangunkan secara holistik dan memanfaatkan kesejahteraan komuniti setempat dan penjana ekonomi.
4. Bagi tujuan tersebut, MOTAC kini meneruskan pelbagai program pembangunan kapasiti kepada penggiat-penggiat pelancongan dan komuniti setempat terutamanya yang melibatkan perkampungan rumah panjang di kawasan Parlimen Lubok Antu.

## **NO. SOALAN : 13**

5. Ini termasuklah program untuk membangun dan mempromosikan produk kraf kepada pelancong, antaranya Program Pengkomersialan Kraf Secara Fizikal dan Digital, Program Reka Bentuk dan Pembangunan Kraf dan Program Kemahiran Komuniti Kraf. Sehingga 30 September 2021, seramai 17 orang usahawan kraf dan 24 orang tenaga kerja telah dibangunkan di kawasan Lubok Antu dengan nilai jualan kraf melebihi RM169,000.
6. Daripada aspek promosi, pelbagai inisiatif dilaksanakan oleh Tourism Malaysia bagi mempromosikan negara termasuk produk-produk pelancongan yang unik di kawasan luar bandar, seperti Lubok Antu melalui program usahasama dengan pengusaha-pengusaha pelancongan antarabangsa.
7. Tourism Malaysia turut memberi penekanan dalam menggunakan media sosial dan media digital bagi mempromosikan destinasi-destinasi menarik dan unik di seluruh negara. Bagi negeri Sarawak, antara program terkini adalah penganjuran Webinar #13, 2021 – Destinasi Sarawak, Bumi Kenyalang pada 12 Oktober 2021 baru-baru ini. Ia merupakan kolaborasi antara Tourism Malaysia Medan dan Tourism Malaysia Sarawak bersama penggiat industri pelancongan negeri Sarawak.
8. Penyampaian maklumat berkenaan produk-produk pelancongan negara di platform digital ini akan membolehkan para pelancong menerima maklumat produk-produk pelancongan yang ditawarkan secara terus dan mudah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN ISNARAISSAH MUNIRAH MAJILIS  
[ KOTA BELUD ]**

**TARIKH : 27 OKTOBER 2021 (RABU)**

**SOALAN**

**PUAN ISNARAISSAH MUNIRAH MAJILIS [ KOTA BELUD ]** minta **MENTERI TENAGA DAN SUMBER ASLI** menyatakan status terkini pemulangan hak pemilikan Sabah Electricity Sdn. Bhd. (SESB) kepada Sabah.

**JAWAPAN**

Tuan Yang di-Pertua,

1. Kerajaan Persekutuan komited untuk meneruskan penyerahan kuasa pembekalan elektrik dan Sabah Electricity Sdn. Bhd. (SESB) kepada Kerajaan Negeri Sabah dan memulakan rundingan dengan Kerajaan Negeri Sabah.

2. Dalam hal ini, berhubung status terkini pemulangan hak pemilikan atau kuasa pembekalan elektrik Sabah dan Sabah Electricity Sdn. Bhd. (SESB) kepada Kerajaan Negeri Sabah, YAB Ketua Menteri Sabah pada 4 Mac 2021 telah memaklumkan bahawa Kerajaan Negeri Sabah hanya bersedia untuk mengambil alih kuasa pembekalan elektrik Sabah dalam tempoh lima hingga tujuh tahun dari sekarang. Ia juga tertakluk kepada beberapa syarat tertentu yang dicadangkan oleh Kerajaan Negeri Sabah. Cadangan tersebut sedang diteliti dan diperhalusi oleh Kementerian sebelum diangkat untuk pertimbangan Jemaah Menteri. Perbincangan

lanjut akan diadakan dengan Kerajaan Negeri Sabah berpandukan mandat yang diperoleh daripada Jemaah Menteri kelak.

3. Ini adalah kerana Kerajaan Persekutuan amat mengambil berat mengenai kedudukan kewangan SESB yang tidak mampan berikutan kadar tarif elektrik yang dikenakan kepada pengguna-pengguna elektrik di Sabah pada kadar purata 34.52 sen/kWj adalah jauh lebih rendah daripada kos pembekalan elektrik sebenar iaitu 42.34 sen/kWj tanpa subsidi bahan api. Menyedari hakikat ini, Kerajaan Persekutuan telah menyalurkan pelbagai subsidi kepada SESB iaitu subsidi sokongan tarif, subsidi solar berskala besar dan subsidi bahan api. Sejak tahun 2005, jumlah subsidi yang disalurkan kepada SESB telah mencecah RM7.6 bilion. Jumlah ini tidak mengambil kira geran yang disalurkan untuk membangunkan infrastruktur bekalan elektrik di Negeri Sabah sebanyak RM2.3 bilion dalam tempoh Rancangan Malaysia ke-11 dan ke-12

4. Rundingan di peringkat Kerajaan Persekutuan dan Kerajaan Negeri Sabah akan dilaksanakan setelah pakej cadangan balas yang dicadangkan oleh Kerajaan Persekutuan diluluskan oleh Jemaah Menteri kelak.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB DATO' SRI BUNG MOKTAR BIN  
RADIN [ KINABATANGAN ]**

**TARIKH : 27 OKTOBER 2021 (RABU)**

**SOALAN NO. 15**

minta **MENTERI KOMUNIKASI DAN MULTIMEDIA** menyatakan apakah usaha Kementerian dalam meningkatkan kualiti capaian rangkaian internet di kawasan bandar dan luar bandar. Berapa peruntukan yang disediakan bagi tujuan ini bagi kawasan Parlimen Kinabatangan.

**JAWAPAN:**

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah mengambil beberapa inisiatif dalam menghasilkan sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih.

Antara inisiatif untuk menambahbaik infrastruktur digital di Sabah dan Parlimen Kinabatangan melalui Pelan Jalinan Digital Negara (JENDELA) di bawah Fasa 1 setakat 30 September 2021 adalah seperti berikut:



**SOALAN NO : 15**

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Pelaksanaan	Siap
Kinabatangan	56	0	212	60	530	798	13	
Sabah	538	51	3,500	2,196	251,165	103,281	138	-

Secara umumnya, pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022. Jumlah perbelanjaan yang diperlukan adalah dianggarkan sebanyak RM250 juta yang melibatkan pembiayaan secara komersial oleh penyedia perkhidmatan serta Kumpulan Wang Pemberian Perkhidmatan Sejagat (USP).

Untuk makluman Ahli Yang Berhormat juga, peratusan liputan 4G di kawasan berpenduduk di Sabah telah meningkat kepada 83.48% pada suku kedua 2021 berbanding 73.41% sebelum pelaksanaan JENDELA pada suku kedua 2020. Manakala di Parlimen Kinabatangan pula, peratusan liputan jalur lebar 4G telah meningkat kepada 56.13% berbanding 49.22% sebelum pelaksanaan JENDELA.

Apabila kesemua inisiatif Jendela Fasa 1 siap kelak, liputan 4G di kawasan berpenduduk di Parlimen Kinabatangan dijangka akan meningkat kepada 68.71% menjelang penghujung tahun 2022. Tidak dinafikan peratusan ini masih rendah berbanding sasaran liputan kebangsaan, namun begitu pihak Kementerian sentiasa mengkaji keperluan untuk meningkatkan kualiti dan mengisi kelompongan liputan di bawah pelan Jendela Fasa 2 kelak. Oleh yang demikian, lebih banyak projek-projek baharu dengan menggunakan pelbagai teknologi akan dirancang bagi meningkatkan lagi liputan kepada 100% di kawasan berpenduduk. Selain itu, usaha penambahbaikan rangkaian akan diteruskan di kawasan-kawasan yang telah mempunyai liputan untuk memberikan kualiti pengalaman yang lebih baik kepada pengguna.

Para pengguna disaran melayari portal *JENDELA Map* (<https://jendela.my>) yang telah dilancarkan pada Julai lepas, bagi melaporkan lokasi yang kurang mendapat liputan agar boleh dimasukkan ke dalam perancangan masa hadapan. Maklumat yang diperoleh daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbahbaikan liputan dan kualiti perkhidmatan jalur lebar dari semasa ke semasa.

Tuan Yang Dipertua,

Selain daripada pembinaan menara-menara telekomunikasi dan satelit, Pihak Kerajaan akan turut melaksanakan Penyediaan infrastruktur jalur lebar menggunakan kaedah Point of Presence (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Pelaksanaan PoP bagi Fasa 1 akan melibatkan 630 lokasi berhampiran sekolah manakala bagi Fasa 2 pula akan melibatkan 3,693 lokasi berhampiran sekolah di kawasan luar bandar di seluruh negara. Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap menjelang akhir RMK-12 Tahun 2025. Keseluruhan jumlah PoP di kawasan luar bandar di negeri Sabah adalah sebanyak 695 dan daripada jumlah tersebut pula sebanyak 67 adalah di Parlimen Kinabatangan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 27 OKTOBER 2021 (RABU)**

**SOALAN**

minta **MENTERI PENGAJIAN TINGGI** menyatakan kriteria dan merit seseorang yang dilantik ke LPU universiti-universiti awam (UA), dan apakah ahli-ahli LPU di UA-UA yang telah dilantik dari Mac 2020 sehingga 25 Oktober 2021 menepati kriteria-kriteria tersebut.

**JAWAPAN**

Tuan Yang di-Pertua,

Dalam proses pelantikan ahli-ahli Lembaga Pengarah Universiti (LPU), kuasa Menteri Pengajian Tinggi adalah berdasarkan Peraturan 14(1), Jadual Pertama, Akta Universiti dan Kolej Universiti 1970 (Akta 30) yang memperuntukkan “Pelantikan ahli Lembaga, kecuali Naib Canselor, hendaklah dibuat oleh Menteri bagi tempoh tiga tahun dan apabila habis tempoh itu, ahli Lembaga itu layak dilantik semula”. Manakala Seksyen 13(1) Akta 30 pula menetapkan komposisi keahlian LPU hendaklah mewakili kelompok tertentu yang dapat membantu Lembaga melaksanakan fungsi dengan berkesan. Justeru, selain wakil-wakil Perkhidmatan Awam yang terdiri daripada pegawai kanan Kementerian Pengajian Tinggi dan Kementerian Kewangan yang bertindak sebagai pemegang taruh utama Universiti Awam, pelantikan Ahli LPU perlu menepati komposisi yang termaktub di bawah Akta 30 iaitu:

**i) Pengerusi LPU**

Calon mempamerkan daya kepimpinan dan keupayaan pengurusan yang cemerlang, mempunyai keperibadian unggul, dihormati oleh masyarakat, mempunyai tahap integriti serta akauntabiliti yang tinggi dan telah memberikan banyak sumbangan kepada negara.

**ii) Wakil Masyarakat Setempat**

Calon dilantik dalam kalangan pemimpin masyarakat setempat atau berasal dari negeri lokasi UA berkenaan. Calon haruslah seorang yang dihormati oleh masyarakat setempat dan berupaya membantu pihak universiti melaksana aktiviti kemasyarakatan serta membawa isu masyarakat untuk diselesaikan oleh pakar-pakar di universiti.

**iii) Wakil Senat**

Seorang profesor Universiti yang dipilih oleh Senat daripada kalangan ahli yang disebut dalam Peraturan 17(d) Jadual Pertama Akta 30. Peraturan 17(d) merujuk kepada sebahagian daripada keanggotaan Senat yang terdiri daripada tidak lebih daripada dua puluh orang profesor yang dipilih bagi tempoh tiga tahun oleh semua profesor sepenuh masa dan professor madya Universiti. Kaedah pemilihan wakil Senat dalam LPU kebiasaannya melalui proses undian dalam kalangan Ahli Senat dan calon yang terpilih akan dipertimbangkan oleh YB Menteri untuk pelantikan.

**iv) Wakil Sektor Swasta**

Calon berpengalaman luas dalam selok-belok tadbir urus organisasi, mempunyai kelayakan akademik atau pengalaman yang bersesuaian dengan bidang tujahan universiti yang diwakili, mampu menyuntik perspektif baru dalam kepimpinan organisasi dan pengumpulan dana serta berupaya memperkukuhkan jaringan dengan pihak industri dan membantu menerapkan amalan tadbir urus korporat yang baik (*Good Corporate Governance*) dalam pentadbiran universiti.

**v) Wakil Alumni**

Calon adalah seorang tokoh yang boleh menjadi contoh ikutan kepada warga universiti khususnya para pelajar dan mampu menggerakkan usaha dalam pengumpulan dana universiti melalui jaringan perhubungan dengan alumni. Selain itu, calon mempunyai keupayaan menggalakkan dan menyatukan alumni supaya menyumbang kembali dalam apa jua bentuk kepada pihak universiti.

**vi) Wakil Berpengetahuan dan Berpengalaman**

Calon dilantik berdasarkan pengetahuan dan pengalaman dalam bidang tertentu yang bersesuaian dengan bidang tujuan universiti. Calon boleh terdiri daripada kalangan pegawai universiti berkecuali, bekas pegawai tinggi Kerajaan dan individu lain yang pada pendapat Menteri dapat membantu LPU dalam pengurusan universiti.

Tuan Yang di-Pertua,

Kementerian Pengajian Tinggi juga telah menghasilkan *University Transformation Program (UniTP) Greenbook: Enhancing University Board Governance and Effectiveness* sebagai sebahagian daripada dokumen rujukan di bawah Pelan Pembangunan Pendidikan Malaysia (Pendidikan Tinggi) 2015-2025. Buku Hijau ini antara lainnya turut menyentuh perkara-perkara berkenaan saiz dan komposisi LPU, pencalonan Ahli LPU, peningkatan penyertaan wanita dalam LPU, keahlian daripada individu yang mempunyai pendedahan di peringkat antarabangsa dan mempunyai kepakaran dalam bidang pengkhususan tertentu.

Dalam hal ini, saya mengesahkan bahawa ahli-ahli LPU yang telah dilantik dari Mac 2020 sehingga 25 Oktober 2021 adalah sebagaimana komposisi yang telah ditetapkan di bawah Akta 30 dan turut mengambil kira perkara-perkara yang dinyatakan di dalam Buku Hijau. Kepelbagaian latar belakang profesional dan pengalaman ahli LPU yang dilantik di sesebuah universiti juga turut diambil kira sebelum sebarang pelantikan dimuktamadkan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 27 OKTOBER 2021 (RABU)**

**SOALAN**

**Dato' Sri Hasan bin Arifin [ Rompin ]** minta **MENTERI PERTANIAN DAN INDUSTRI MAKANAN** menyatakan statistik terkini rampasan oleh Jabatan Perkhidmatan Kuarantin dan Pemeriksaan Malaysia (MAQIS). Apakah rampasan tertinggi yang pernah dilakukan dan apakah yang dilakukan MAQIS terhadap setiap rampasan tersebut.

**JAWAPAN:**

**Tuan Yang Di Pertua,**

Untuk makluman Ahli Yang Berhormat, Jabatan Perkhidmatan Kuarantin dan Pemeriksaan Malaysia (MAQIS) dipertanggungjawabkan untuk mengawal biosekuriti bagi mana-mana pengimportan dan pengeksportan yang melibatkan komoditi hasil pertanian seperti tumbuhan, binatang, karkas, ikan, keluaran pertanian, tanah dan mikroorganisma. Pemerkasaan dan peningkatan pemantauan dan penguatkuasaan sentiasa menjadi keutamaan MAQIS melalui aktiviti pemeriksaan menyeluruh, prosedur persampelan bagi komoditi berisiko, dan pelaksanaan aktiviti kuarantin haiwan hidup dan hasil pertanian bagi memastikan ianya adalah bebas daripada sebarang penyakit berbahaya dan serangga perosak.

Berdasarkan data terkini sehingga 30 September 2021, MAQIS dengan kerjasama agensi penguatkuasaan yang lain seperti Jabatan Kastam Diraja Malaysia (JKDM), Pasukan Gerakan Am (PGA), Angkatan Tentera Malaysia (ATM) serta Bahagian Kawalan Keselamatan Makanan (BKMM), Kementerian Kesihatan (KKM) telah mengendalikan sebanyak 248 kes ketidakpatuhan terhadap Akta Perkhidmatan Kuarantin dan Pemeriksaan Malaysia 2011 [*Akta 728*]. Jumlah rampasan yang telah dibuat bagi komoditi pertanian dan agromakanan adalah sebanyak 304 ribu kilogram bernilai RM6.55 juta. Kes rampasan yang telah disabitkan kesalahan di bawah Akta 728 boleh dikenakan hukuman maksimum denda tidak melebihi satu ratus ribu ringgit atau penjara selama tempoh tidak melebihi enam tahun atau kedua-duanya dan, bagi kesalahan kedua atau yang berikutnya didenda tidak melebihi satu ratus lima puluh ribu ringgit atau dipenjarakan selama tempoh tidak melebihi tujuh tahun atau kedua-duanya.

Rampasan tertinggi oleh MAQIS merupakan kes pengimportan produk ayam sejuk beku dari negara China dengan nilai dagangan berjumlah RM247 ribu dengan keberatan 27 ribu kilogram. Melalui prosedur pemeriksaan fizikal dan persampelan produk yang

## **SOALAN NO : 17**

dilaksanakan di pintu masuk seterusnya ujian makmal oleh Jabatan Perkhidmatan Veterinar, keputusan sampel telah mendapati terdapat kehadiran virus penyakit *Highly Pathogenic Avian Influenza* (HPAI). Kes tersebut telah dikenakan tindakan perundangan di bawah seksyen 14, Akta Kuarantin dan Pemeriksaan Malaysia 2011, di mana syarikat berkenaan telah dikenakan kompaun sebanyak RM 16,000.00 dan produk ayam sejuk beku tersebut telah dilucuthakan dan dilupuskan dengan kaedah tanam.

Untuk makluman Ahli Yang Berhormat jua, mana-mana konsainan yang telah dilucuthakkan akan dilupus dengan kaedah tanam atau bakar untuk mengelakkan pengimportan produk hasil pertanian dan agromakanan yang dikhuatiri berpenyakit atau berperosak serta berpotensi menjejaskan dan mengganggu gugat industri pertanian negara. Selain itu, bagi komoditi daging sejukbeku yang didapati diimport tanpa Sijil Kesihatan Veterinar atau Sijil Halal yang sah akan dilupuskan dengan kaedah serahan kepada Zoo atau badan – badan yang bersesuaian untuk dijadikan makanan kepada haiwan liar.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KE-EMPAT  
PARLIMEN KE-EMPAT BELAS**

**PERTANYAAN : LISAN**

**DARIPADA : YB TUAN LOKE SIEW FOOK  
( SEREMBAN )**

**TARIKH : 27 OKTOBER 2021 ( RABU )**

**SOALAN**

**TUAN LOKE SIEW FOOK [ SEREMBAN ]** minta **MENTERI PENGANGKUTAN** menyatakan butir-butir terperinci untuk kontrak penyelenggaraan atau “MRO” untuk Level 1 dan 2 serta Level 3 dan 4 untuk semua tren ETS dan KTM Komuter yang sedang beroperasi termasuk nama syarikat kontraktor, nilai kontrak dan adakah tender terbuka dilaksanakan.

**JAWAPAN**

**Tuan Yang di-Pertua,**

Kerajaan telah melantik CSR ZELC secara Rundingan Terus yang kemudiannya dikenali sebagai CKM LANDAS MRO Sdn. Bhd. (CKM Landas) untuk melaksanakan kerja-kerja *Maintenance, Repair and Overhaul* (MRO) untuk *Level 1* dan *Level 2* bagi 38 *Six-Cars Sets* tren komuter untuk tempoh di antara tahun 2012 dan 2022 seperti berikut:

No.	Tempoh Kontrak	Bil. Tahun	Nilai Kontrak (RM)	Purata Kos Bulanan (RM)
1.	Feb 2012 – Feb 2014	2	133, 250, 000	5, 552, 083
2.	Feb 2014 – Feb 2017	3	200, 061, 480	5, 557, 273
3.	Feb 2017 – Feb 2020	3	211, 480, 600	5, 874, 461
4.	Feb 2020 – Feb 2022	2	133, 006, 666	5, 250, 000

Skop MRO ini merangkumi *Level 1* bagi pemeriksaan harian dan selenggaraan mingguan, *Level 2* bagi selenggaraan bulanan dan selenggaraan tidak berjadual. Ringkasan kerja-kerja MRO yang dilaksanakan adalah seperti berikut:

No.	Jenis Tahap MRO	Penyenggaraan Selepas Tempoh/Jarak Larian
1.	Pemeriksaan Harian	Harian bagi setiap set
2.	<i>Level 1</i>	Mingguan bagi setiap set
3.	<i>Level 2</i>	Bulanan bagi setiap set
4.	Tidak Berjadual	Selain dari program penyenggaraan berjadual (Sebagai contoh; <i>Vandalism</i> dan lain-lain kerosakan tidak dijangka)

Ketika ini, Kerajaan sedang menyediakan kertas cadangan berhubung hala tuju kerja-kerja MRO *Level 1* dan *Level 2* bagi

memastikan kerja-kerja MRO tersebut dapat dilaksanakan mengikut tempoh masa yang ditetapkan selepas kontrak di atas berakhir pada Februari 2022. Untuk itu, Kerajaan ketika ini diperingkat dasar sedang meneliti keperluan sekiranya kerja-kerja MRO *Level 1* dan *Level 2* ini adalah lebih sesuai dan efisien dilaksanakan secara dalaman oleh Keretapi Tanah Melayu Berhad (KTMB) dengan Kos yang lebih menjimatkan.

Bagi memastikan keselamatan dan kesinambungan kerja-kerja MRO ini dilaksanakan, Kerajaan telah meluluskan sejumlah peruntukan untuk melaksanakan kerja-kerja MRO *Level 4* pada Februari 2020 setelah mendapati bahawa terdapatnya keperluan semasa untuk melaksanakan MRO *Level 4* bagi 10 *Six-Cars Sets* tren ETS *class 93* dan 35 *Six-Cars Sets* tren komuter. Skop MRO *Level 4* adalah seperti berikut:

No.	Jenis Tahap MRO	Penyenggaraan Selepas Tempoh/Jarak Larian
1.	<i>Level 4</i>	Selepas 8 tahun beroperasi atau setiap 1,700,000 km (yang mana terdahulu)  Menjalankan kerja-kerja MRO <i>Level 4</i> ( <i>bogie, coupler, air supply &amp; brake system, auxiliary system &amp; interior</i> )

Ketika ini, Kerajaan masih dalam proses untuk perolehan pelaksanaan kerja-kerja MRO *Level 4* tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AHMAD JOHNIE BIN ZAWAWI (IGAN)**

**TARIKH : 27 OKTOBER 2021 (RABU)**

**SOALAN**

**TUAN AHMAD JOHNIE BIN ZAWAWI** minta **MENTERI KANAN PENDIDIKAN** menyatakan sejauh manakah masalah keciciran murid sekolah di Sarawak sejak lima tahun lepas dan apakah sebab berlakunya masalah berkenaan serta apakah tindakan-tindakan yang telah diambil termasuk kawasan Parlimen Igan.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) merujuk kepada definisi keciciran sebagai murid warganegara Malaysia yang berada dalam sistem pendidikan tetapi keluar daripada sistem sebelum tamat tempoh pendidikan.

Berdasarkan statistik KPM kadar keciciran murid peringkat rendah di Sarawak menurun daripada 0.34 peratus pada tahun 2016 kepada 0.25 peratus pada tahun 2020. Walau bagaimanapun, kadar keciciran peringkat sekolah menengah telah meningkat daripada 2.23 peratus pada tahun 2016 kepada 3.38 peratus pada tahun 2020 (data seperti pada 30 Jun pada setiap tahun). Khusus untuk Parlimen Igan, kadar keciciran murid sekolah menengah kerajaan dan bantuan kerajaan semakin menurun daripada 13.68 peratus pada tahun 2016 kepada 0.52 peratus pada tahun 2021. Manakala di peringkat sekolah rendah kerajaan dan bantuan kerajaan tiada keciciran pada tahun 2016 hingga 2019 dan 2021. Data menunjukkan terdapat

keciciran sebanyak 0.48 peratus pada tahun 2020 sahaja.

Untuk makluman Ahli Yang Berhormat, berdasarkan kepada tinjauan yang telah dilaksanakan oleh KPM, antara punca keciciran murid adalah kerana kurang minat untuk belajar, kemiskinan, masalah disiplin, perceraian ibu bapa, kurang kesedaran ibu bapa terhadap pendidikan anak-anak, gejala sosial dan bekerja untuk membantu keluarga.

Berdasarkan faktor yang menjadi punca keciciran murid, KPM telah menyediakan Garis Panduan Mengurus Murid Berisiko Cicir di Sekolah (GPMBC). Objektif GPMBC ini adalah untuk membantu pihak sekolah mengenal pasti murid berisiko cicir serta mengurus murid berisiko cicir secara berkesan dan sistematik. GPMBC ini juga bertujuan untuk memastikan pemantauan murid khususnya murid berisiko cicir dapat dilaksanakan oleh pihak jabatan pendidikan negeri (JPN), pejabat pendidikan daerah (PPD) dan sekolah secara berterusan agar murid kekal bersekolah sehingga tamat tingkatan 5.

KPM turut menyediakan modul Serlahkan Keunggulan Diri (SUDI dan SUDI 2.0) sebagai panduan untuk melaksanakan intervensi dalam menangani keciciran murid. Melalui modul ini, aktiviti sokongan yang sistematik dapat dilaksanakan secara berterusan bagi memastikan murid kekal bersekolah sehingga tamat persekolahan.

KPM juga mengadakan kerjasama dengan pelbagai pihak, agensi dan komuniti setempat bagi membantu murid yang tercicir meneruskan persekolahan sehingga tamat Tingkatan 5. KPM telah menyediakan *Dashboard* Murid Berisiko Cicir KPM sebagai langkah pencegahan murid agar tidak tercicir daripada sistem pendidikan. *Dashboard* ini juga boleh memantau murid yang berisiko cicir di seluruh negara termasuk sekolah-sekolah kerajaan dan bantuan kerajaan di Parlimen Igan.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[SETIAWANGSA]**

**TARIKH : 27 OKTOBER 2021 (RABU)**

**SOALAN**

**TUAN NIK NAZMI BIN NIK AHMAD [SETIAWANGSA]** minta **MENTERI TENAGA DAN SUMBER ASLI** menyatakan adakah Malaysia boleh turut serta dalam program Asia Development Bank untuk membeli dan menutup stesen jana kuasa arang batu baharu lebih awal pada 2036 berbanding rancangan sedia ada Kementerian.

**JAWAPAN**

Tuan Yang di-Pertua,

- 1) Semakan Kementerian mendapati bahawa, Asia Development Bank (ADB) hanya berkongsi secara ringkas cadangannya untuk menyediakan pembiayaan bagi penutupan loji jana kuasa arang batu, yang mana perincian akan diumumkan semasa Mesyuarat COP-26 di Glasgow yang akan diadakan tidak lama lagi. Oleh itu, Kerajaan berpandangan bahawa adalah tidak wajar Kerajaan membuat sebarang komitmen tanpa memahami model yang akan ditawarkan oleh ADB.
- 2) Walau bagaimanapun, Kementerian ingin menjelaskan bahawa sebarang keputusan untuk menghentikan operasi loji-loji jana kuasa arang batu lebih awal dari tempoh tamat Perjanjian Pembelian Tenaga akan melibatkan kos yang tinggi di samping turut memberi implikasi terhadap jaminan bekalan elektrik negara.
- 3) Oleh itu, cadangan ini perlu diperhalusi agar ia tidak membebankan rakyat dan dapat memastikan rakyat akan terus mendapat bekalan elektrik yang berdaya harap.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN YUSUF BIN ABD. WAHAB  
(TANJONG MANIS)**

**TARIKH : 27 OKTOBER 2021 (RABU)**

**SOALAN**

**TUAN YUSUF BIN ABD. WAHAB** minta **MENTERI KANAN PENDIDIKAN** menyatakan kaedah penyelesaian masalah guru yang tidak mahu divaksin. Apakah jaminan Kementerian berkenaan keselamatan kesihatan murid sekolah yang mungkin terdedah kepada guru yang tidak divaksin ini.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) komited untuk menyediakan persekitaran sekolah yang selamat bagi pengajaran dan pembelajaran (PdP) secara bersemuka. Dalam hal ini, KPM sentiasa memantau rapi status vaksinasi warga sekolah termasuk guru, anggota kumpulan pelaksana dan pekerja sokongan sekolah.

Guru adalah penjawat awam yang tertakluk kepada peraturan yang dikeluarkan oleh Jabatan Perkhidmatan Awam (JPA). Oleh itu, KPM akan mengambil tindakan sewajarnya berdasarkan Pekeliling Perkhidmatan Bilangan 4 Tahun 2021 yang disediakan oleh JPA. KPM akan memastikan guru yang enggan divaksin perlu melengkapkan vaksinasi sebelum 1 November 2021 kecuali mereka yang mendapat pengesahan daripada pengamal perubatan berdaftar. Sekiranya guru tersebut masih gagal mematuhi arahan ini, mereka boleh dikenakan tindakan tatatertib.



## **SOALAN NO : 21**

Pada masa yang sama, KPM secara berterusan mengadakan konsultasi untuk memastikan semua guru menerima vaksin. KPM turut melaksanakan pelbagai program kesedaran vaksinasi melalui sesi libat urus, serta pendekatan secara berhemah seperti pujukan oleh bahagian, jabatan pendidikan negeri dan pejabat pendidikan daerah. Guru yang tidak boleh divaksin atas sebab kesihatan perlu mengemukakan maklumat kesihatan yang telah disahkan oleh pegawai perubatan kerajaan kepada Ketua Jabatan masing-masing.

Untuk makluman Ahli yang Berhormat, untuk memastikan PdP secara bersemuka dijalankan dalam persekitaran yang selamat, guru yang tidak divaksin tidak dibenarkan berinteraksi dengan murid dalam dan luar bilik darjah. Guru tersebut perlu melaksanakan tugas-tugas PdP yang diarahkan oleh pentadbir sekolah dari semasa ke semasa selaras dengan Garis Panduan Pengurusan dan Pengoperasian Sekolah 3.0.

KPM yakin pendekatan dan usaha yang berterusan ini dapat mewujudkan persekitaran sekolah yang selamat sepanjang sesi PdP secara bersemuka.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN RUSNAH BINTI ALUAI  
(TANGGA BATU)**

**TARIKH : 27 OKTOBER 2021 (RABU)**

**SOALAN**

**PUAN RUSNAH BINTI ALUAI** minta **MENTERI KANAN PENDIDIKAN** menyatakan adakah Malaysia kekurangan tenaga pengajar kerana ramai guru-guru telah diambil tindakan tatatertib dan diasingkan dari sesi pembelajaran akibat enggan mengambil vaksin.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) bertanggungjawab dalam memastikan pengajaran dan pembelajaran (PdP) secara bersemuka dijalankan dalam persekitaran yang selamat.

Untuk makluman Ahli Yang Berhormat, KPM tidak akan menghadapi isu kekurangan guru kerana bilangan guru yang tidak divaksin adalah sangat kecil berbanding keseluruhan jumlah guru iaitu 0.5 peratus sahaja.

KPM akan mengambil tindakan sewajarnya berdasarkan Pekeliling Perkhidmatan Bilangan 4 Tahun 2021 yang disediakan oleh Jabatan Perkhidmatan Awam (JPA). KPM akan memastikan guru yang enggan divaksin perlu melengkapkan vaksinasi sebelum 1 November 2021 kecuali mereka yang mendapat pengesahan daripada pengamal perubatan berdaftar. Sekiranya guru tersebut masih gagal mematuhi arahan ini, mereka boleh dikenakan tindakan tatatertib.

Bagi memastikan persekitaran sekolah sentiasa berada dalam keadaan selamat, guru yang tidak divaksin tidak dibenarkan berinteraksi dengan murid dalam dan luar bilik darjah. Guru tersebut perlu melaksanakan tugas-tugas PdP yang diarahkan oleh pentadbir sekolah dari semasa ke semasa. Mereka turut diwajibkan memakai pelitup muka berganda dan pelindung muka semasa berada di kawasan sekolah.

KPM yakin pendekatan dan usaha yang berterusan ini dapat mewujudkan persekitaran sekolah yang selamat sepanjang sesi PdP secara bersemuka.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK ROBERT LAWSON CHUAT  
[ BETONG ]**

**TARIKH : 27 OKTOBER 2021 (RABU)**

**SOALAN**

**DATUK ROBERT LAWSON CHUAT** minta **MENTERI PERTANIAN DAN INDUSTRI MAKANAN** menyatakan sejauh manakah dana Tabung Bencana Pertanian dibelanjakan pada tahun 2021 dan apakah kaedah pengagihan dan syarat-syarat kelayakan penerima bantuan.

**JAWAPAN:**

**Tuan Yang Di Pertua,**

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa peka dalam menyantuni kumpulan sasar seperti pesawah, pekebun-pekebun kecil, penternak dan lain-lain terutama yang mengalami kerugian akibat ditimpa bencana. Dua bentuk bantuan yang disediakan oleh MAFI kepada golongan sasar yang terkesan akibat bencana ialah Peruntukan Pembangunan Semula Projek Agromakanan (PPSPA) dan Tabung Bencana Tanaman Padi (TBTP).

Pada tahun 2021, MAFI telah menerima agihan sejumlah RM30 juta di bawah PPSPA yang disasarkan kepada golongan sasar berskala kecil dan sederhana seperti petani, penternak, nelayan, pengusaha akuakultur, pengusaha agropelancongan dan industri agromakanan. Perbelanjaan sehingga Oktober 2021 di bawah PPSPA adalah sejumlah RM6.1 juta. Perbelanjaan ini adalah berdasarkan permohonan yang telah diterima dan penilaian di peringkat Jawatankuasa Teknikal PPSPA.

Secara umumnya bantuan PPSPA ini bertujuan untuk meringankan beban kerugian dan membantu golongan sasar MAFI untuk membangunkan semula aktiviti-aktiviti agromakanan. Dalam hal ini, kadar bantuan adalah berpandukan kepada 50% had siling daripada nilai kerugian golongan sasar tertakluk kepada penilaian di peringkat Jawatankuasa Teknikal PPSPA. Bantuan akan diberikan dalam bentuk *in-kind* seperti input pertanian, peralatan, mesin atau mana-mana yang bersesuaian.

Golongan sasar berskala kecil dan sederhana MAFI di bawah 11 sektor (tanaman buah-buahan, sayur-sayuran, fertigasi, tanaman komoditi tinggi, tanaman makanan ternakan, ternakan veterinar, akuakultur, nelayan, nelayan darat, Industri Asas Tani (IAT), agropelancongan) yang terkesan akibat bencana seperti yang disenaraikan oleh Majlis Keselamatan Negara (MKN) adalah layak untuk menerima bantuan ini.

Bagi sektor padi dan beras pula, MAFI membantu meringankan beban pesawah yang terjejas atau mengalami kemerosotan pengeluaran padi di luar jangka menerusi TBTP. TBTP merupakan salah satu bentuk bantuan segera berbentuk *touch-point* kepada pesawah berupa bantuan kerugian hasil padi, bantuan penanaman semula padi, bantuan bencana kemarau, atau bantuan input tanaman padi yang diberikan berdasarkan tahap kerosakan serta umur tanaman padi. Kemerosotan pengeluaran padi boleh berpunca daripada pelbagai faktor seperti serangan penyakit, bencana alam dan lain-lain faktor yang tidak dapat dielakkan.

Sehingga kini, jumlah bantuan yang telah disalurkan kepada pesawah pada tahun 2021 adalah sebanyak RM11,178,295.70. Secara umumnya, kadar bantuan yang diberikan adalah antara RM876.00 sehektar hingga RM1,800 sehektar dan berbentuk *one-off*. Kategori bantuan TBTP adalah seperti berikut

- i) Bantuan Kerugian Hasil Padi sebanyak RM1,800 per hektar bagi tanaman padi lebih daripada 70 hari;
- ii) Bantuan Penanaman Semula Padi sebanyak RM 876 per hektar bagi tanaman padi kurang daripada 70 hari;
- iii) Bantuan Bencana Kemarau sebanyak RM876 per hektar; dan
- iv) Bantuan Input Tanaman Padi yang mana kadar bantuan tertakluk kepada penilaian oleh Jabatan Teknikal.

Kadar bantuan adalah tertakluk kepada kadar yang telah ditetapkan dengan keluasan maksimum sebanyak tiga (3) hektar sahaja.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : JAWAB LISAN**

**DARIPADA : DATUK WIRA HAJI MOHD. ANUAR  
MOHD. TAHIR [ TEMERLOH ]**

**TARIKH : 27 OKTOBER 2021 (RABU)**

**SOALAN**

**DATUK WIRA HAJI MOHD. ANUAR MOHD. TAHIR [TEMERLOH]** minta **MENTERI PERTANIAN DAN INDUSTRI MAKANAN** menyatakan kesungguhan Kementerian dalam pelaksanaan Jaminan Makanan (Food Security). Walaupun Malaysia merupakan negara kedua terbaik dalam kalangan negara Asia Tenggara selepas Singapura dan tersenarai dalam Indeks Keselamatan Makanan Global (GFSI) di tangga 44 dari 113 negara, namun kemampuan rakyat untuk memperoleh kuantiti makanan asas berkhasiat dengan harga yang mampu jauh dari tercapai, malah semakin mahal.

**JAWAPAN**

**Tuan Yang Di Pertua,**

Untuk makluman Ahli Yang Berhormat, Laporan Indeks Sekuriti Makanan Global 2021 (GFSI) telah diterbitkan dan kedudukan negara masih berada di tahap yang baik. Berdasarkan laporan terkini GFSI 2021, Malaysia berada di tangga ke-39 daripada 113 negara yang terlibat. Berdasarkan laporan GFSI tersebut, pencapaian Malaysia dilihat sangat baik terutamanya dalam kategori *Affordability* (Kemampuan) dengan skor 85.5 peratus dan berada di tangga ke-25 daripada 113 negara. Pencapaian ini menunjukkan kebolehcapaian makanan dalam negara masih di tahap yang baik.

Kementerian Pertanian dan Industri Makanan (MAFI) turut memantau aspek kebolehcapaian menerusi Pelan Tindakan Mengenai Dasar Sekuriti Makanan Negara (Pelan Tindakan DSMN) 2021-2025 yang dirangka dengan bermatlamatkan pengukuhan sistem makanan negara bagi menjamin kelangsungan bekalan makanan yang cukup, selamat, bernutrisi dan mampu beli kepada rakyat. Ini termasuklah usaha-usaha untuk memastikan harga makanan adalah bertepatan dengan kuasa beli rakyat yang dilaksanakan dan dipantau menerusi Kluster Kebolehcapaian di bawah Kementerian Perdagangan Dalam Negeri dan Hal Ehwal Pengguna (KPDNHEP).

MAFI juga telah mengatur langkah strategik dalam meningkatkan produktiviti sektor agromakanan bagi memenuhi permintaan pasaran tempatan dalam usaha untuk menstabilkan harga makanan menerusi:

1. pelaksanaan Program *Smart* Sawah Berskala Besar (*Smart* SBB) yang menyasarkan peningkatan purata hasil per hektar daripada 3.5 tan metrik kepada 7.0 tan metrik dalam tempoh Rancangan Malaysia Kedua Belas (RMKe-12);
2. pembangunan dan pemeraksanaan platform pemasaran produk agromakanan secara e-dagang bagi mengurangkan peranan orang tengah menerusi FAMA dan LKIM seperti Agrobazaar



## SOALAN NO: 24

Online dan NEKMATBIZ serta kerjasama strategik dengan platform swasta;

3. pembangunan makanan ternakan alternatif dan pembangunan industri benih tempatan bagi mengurangkan kebergantungan negara kepada import input pertanian selain menyumbang kepada kestabilan harga makanan; dan
4. pemberian insentif kepada pengeluaran makanan yang selamat dan sihat bagi meningkatkan ketersediaan makanan berkhasiat dengan harga berpatutan di pasaran.

Kesungguhan MAFI untuk mengekalkan kestabilan harga makanan turut diperlihatkan menerusi Jawatankuasa Bersama Antara KPDNHEP-MAFI yang merupakan platform kolaborasi strategik untuk menangani isu kenaikan harga, memandangkan kawalan harga makanan adalah di bawah bidang kuasa Kementerian tersebut. Selain itu, pelaksanaan Program *Contract Farming* di bawah MAFI juga merupakan antara inisiatif yang berteraskan usaha untuk menentukan harga lantai di peringkat ladang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. SHAHRUDDIN BIN MD. SALLEH  
[ SRI GADING ]**

**TARIKH : 27 OKTOBER 2021 (RABU)**

**SOALAN**

Minta **MENTERI PENGAJIAN TINGGI** menyatakan apakah persediaan Kementerian dalam menguruskan kaedah pembelajaran IPTA dan IPTS menuju fasa endemik.

**JAWAPAN**

Tuan Yang di-Pertua,

Kemasukan pelajar secara fizikal ke kampus Institusi Pendidikan Tinggi (IPT) telah dilaksanakan secara berperingkat bermula pada 15 Oktober 2021. Selari dengan itu, proses pengajaran dan pembelajaran (PdP) di kampus bagi Semester 1 Sesi Akademik 2021/2022 dilaksanakan secara hibrid (iaitu secara bersemuka dan dalam talian) dengan pematuhan ketat SOP yang telah diluluskan oleh Majlis Keselamatan Negara (MKN). Memandangkan masih terdapat segelintir pelajar yang belum memasuki kampus, pelajar-pelajar ini boleh meneruskan PdP secara dalam talian di lokaliti masing-masing sehingga dibenarkan oleh pihak IPT untuk menjalani PdP secara fizikal.

Dalam hubungan ini, KPT telah memperkenalkan pelbagai inisiatif bagi memastikan ketersediaan IPT dalam memberikan suasana PdP hibrid yang kondusif kepada pelajar. Ini termasuklah menyediakan capaian jalur lebar yang bersesuaian di IPT, menaik taraf MYREN, serta memberikan bantuan peranti seperti sumbangan laptop dan pelan data yang bersesuaian kepada pelajar. Selain daripada itu, kurikulum program juga telah disesuaikan dengan kaedah pembelajaran dalam talian dan hibrid. Penyelarasan kandungan program dibuat agar dapat memenuhi keperluan pelajar. Ini mengambil kira kandungan pembelajaran yang memenuhi standard program, pendekatan pembelajaran yang lebih fleksibel dan kaedah penilaian yang berbeza daripada kaedah konvensional.

Langkah-langkah yang saya sebutkan tadi merupakan antara pendekatan yang amat signifikan untuk dilaksanakan oleh IPT, khususnya dalam tempoh negara beralih ke fasa endemik. Kementerian yakin bahawa IPT berupaya untuk meneruskan pelaksanaan PdP hibrid dengan mengambil kira jumlah keberadaan pelajar yang lebih besar, tertakluk kepada keperluan SOP dan pengukuhan pembudayaan norma baharu PdP ketika fasa endemik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SHAHARIZUKIRNAIN BIN ABD. KADIR  
[ SETIU ]**

**TARIKH : 27 OKTOBER 2021 (RABU)**

**SOALAN**

**TUAN SHAHARIZUKIRNAIN BIN ABD. KADIR [SETIU]** minta **MENTERI PERTANIAN DAN INDUSTRI MAKANAN** menyatakan bilangan penerima bantuan Program Rezeki Tani serta langkah meningkatkan penglibatan penerima bantuan daripada penduduk luar dan pinggir bandar.

**JAWAPAN**

**Tuan Yang Di Pertua,**

Untuk makluman Ahli Yang Berhormat, Program Rezeki Tani merupakan sebuah program pembasmian kemiskinan di bawah Kementerian Pertanian dan Industri Makanan (MAFI) dengan matlamat untuk membantu meningkatkan pendapatan para peserta melalui bantuan projek ekonomi dalam bidang pertanian serta industri makanan dan asas tani. Kumpulan sasar peserta program adalah terdiri daripada golongan miskin dan berpendapatan rendah khususnya mereka yang tinggal di kawasan luar bandar dan pinggir bandar.

Bagi tempoh 2019 hingga 2020, seramai 1,011 orang peserta telah menerima manfaat daripada Program Rezeki Tani dengan peruntukan berjumlah RM10 juta. Melalui Rancangan Malaysia Ke-12 (RMKe-12),

sebanyak RM10 juta telah disediakan untuk pelaksanaan Program ini bagi tempoh lima (5) tahun. Untuk tahun 2021, MAFI telah diluluskan peruntukan sebanyak RM2 juta bagi membantu 180 orang peserta di seluruh negara. Sehingga 30 September 2021, seramai 146 orang peserta telah diluluskan sebagai peserta Program Rezeki Tani melibatkan peruntukan sebanyak RM1.46 juta.

Secara lazimnya, pelaksanaan Program Rezeki Tani akan tertumpu di kawasan-kawasan yang mempunyai kadar kemiskinan tertinggi yang mana kebanyakan kawasan-kawasan ini adalah terletak di luar bandar serta pinggir bandar. MAFI melalui Jabatan dan Agensi pelaksana di peringkat negeri serta daerah sentiasa memastikan proses bancian peserta di lapangan dibuat mengikut prosedur yang telah ditetapkan dalam mengenal pasti calon yang layak dan memenuhi kriteria-kriteria yang diperlukan. Menerusi proses bancian di lapangan juga, penglibatan lebih berkesan calon peserta dari kawasan luar serta pinggir bandar dapat dipertingkatkan.

MAFI sentiasa prihatin terhadap nasib golongan berpendapatan rendah khususnya mereka yang tinggal di kawasan luar serta pinggir bandar. Dengan adanya Program Rezeki Tani antara lain, MAFI dapat meningkatkan penglibatan mereka dalam aktiviti berkaitan bidang pertanian.

Sekian, terima kasih

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KE-EMPAT BELAS**

**PERTANYAAN : LISAN**

**DARIPADA : YB TUAN ABDUL LATIFF BIN ABDUL  
RAHMAN ( KUALA KRAI )**

**TARIKH : 27 OKTOBER 2021 (RABU)**

**SOALAN**

**TUAN ABDUL LATIFF BIN ABDUL RAHMAN** minta **MENTERI PENGANGKUTAN** menyatakan adakah pihak Kementerian bercadang menaik taraf Stesen Kereta Api Dabong untuk memberi keselesaan kepada penumpang dan menarik lebih ramai pelancong ke Dabong.

**JAWAPAN**

**Tuan Yang di-Pertua,**

Kerajaan sentiasa komited dalam pelaksanaan projek-projek infrastruktur seperti menaiktaraf Stesen Kereta Api kerana melalui projek tersebut bukan sahaja mampu memberikan keselesaan kepada para penumpang malah turut memberi impak pertumbuhan ekonomi termasuk merencanakan aktiviti pelancongan di kawasan persekitaran Stesen Keretapi dan sepanjang jajaran laluan Keretapi.

Pada ketika ini, pihak Kementerian Pengangkutan sedang memberikan fokus melaksanakan projek yang berkeutamaan tinggi bagi menaiktaraf stesen Dabong yang melibatkan peninggian platform (Fasa 1) dan pemanjangan platform berbumbung serta beberapa kemudahan di Stesen tersebut seperti pembesaran ruang menunggu, kaunter tiket, surau, tandas serta kemudahan OKU (Fasa 2).

Projek Fasa 1 dijangka dapat disiapkan pada suku kedua tahun 2022. Manakala kerja-kerja Fasa 2 masih dalam penelitian lanjut daripada segi rekabentuk naiktaraf dan kos terlibat.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG TACK [BENTONG]**

**TARIKH : 27 OKTOBER 2021 (RABU)**

**SOALAN**

**TUAN WONG TACK [BENTONG]** minta **MENTERI PERTANIAN DAN INDUSTRI MAKANAN** menyatakan langkah-langkah yang diambil untuk menangani impak perubahan iklim dalam sektor pertanian.



**JAWAPAN**

**Tuan Yang Di-Pertua,**

Untuk makluman Ahli Yang Berhormat, menyedari impak perubahan iklim kepada sekuriti makanan negara, MAFI dalam proses pelaksanaan Pelan Tindakan Dasar Sekuriti Makanan Negara (DSMN) 2021-2025 yang meliputi langkah-langkah menangani isu-isu perubahan iklim yang melibatkan sektor pertanian. Ini termasuk perluasan penyelidikan dan pembangunan menggunakan kaedah teknologi berasaskan iklim dengan atau dengan izin "*climate-based technology*".

Pelan DSMN ini disokong dengan usaha-usaha bagi mengadaptasi perubahan iklim melalui pelaksanaan langkah-langkah seperti berikut:

1. Bagi sektor padi, pembinaan kelengkapan infrastruktur amalan pengairan sawah secara *Alternate Wetting and Drying* (AWD) bagi menggantikan pengairan secara "banjir" (*Continuously Flooded*) untuk mengoptimumkan penggunaan air dan meningkatkan kecekapan infrastruktur pengairan;
2. Pembangunan dan penggunaan varieti benih padi tahan banjir atau tahan kemarau (padi anaerob dan padi aerob) yang mempunyai kerintangan terhadap saliniti tinggi dan air yang berkurangan;
3. Pertanian dalam persekitaran terkawal (*Control Environment Farming*) seperti kilang tanaman (*plant factory*) merupakan pembangunan pertanian dalam persekitaran terkawal di mana semua elemen yang diperlukan oleh tanaman seperti cahaya, suhu, karbon dioksida dan kelembapan dikawal secara buatan;

## SOALAN NO : 29

4. Penuaian Air Hujan (*Rainwater Harvesting*) dan telaga tiub (*tube well*) merupakan teknologi bagi mengatasi masalah kekurangan sumber air semasa musim panas;
5. Pembuatan silaj dan hay bagi sektor ternakan. Ini bertujuan sebagai konservasi makanan di musim terdapat banyak rumput. Silaj dan hay ini akan menjadi sumber bekalan makanan utama ternakan apabila berlaku kekurangan rumput segar semasa kemarau melanda; dan
6. Penyediaan kemudahan bekalan air paip dan sistem tangki sebagai sumber air utama di kawasan penternakan untuk kegunaan kandang dan siraman pastura bagi mengurangkan tegasan haba (*heat stress*) dan memastikan kelangsungan bekalan makanan ternakan pada musim kemarau yang berpanjangan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN MUHAMMAD BAKHTIAR BIN WAN  
CHIK [ BALIK PULAU ]**

**TARIKH : 27 OKTOBER 2021 (RABU)**

**SOALAN**

**TUAN MUHAMMAD BAKHTIAR BIN WAN CHIK [ BALIK PULAU ]** minta **MENTERI PELANCONGAN, SENI DAN BUDAYA** menyatakan sejauh mana agensi di bawah Kementerian seperti Balai Seni Negara, Istana Budaya, Jabatan Muzium Negara dan lainnya dimanfaatkan sepanjang tempoh pandemik.

**JAWAPAN**

**Tuan Yang di-Pertua,**

1. Walaupun negara sedang menghadapi pelbagai cabaran dalam menangani pandemik COVID-19, Kementerian Pelancongan, Seni dan Budaya (MOTAC) serta agensi-agensi di bawah seliaannya tetap komited dalam meneruskan usaha memartabatkan seni, budaya dan warisan kebangsaan. Pelbagai program telah dilaksanakan, termasuklah penganjuran aktiviti secara dalam talian serta membangunkan platform digital yang memudahkan interaksi di antara penganjur dan peserta program.
2. Kementerian ini melalui Balai Seni Negara telah mengatur perancangan program-program dengan kesesuaian keadaan semasa, melalui pendekatan Disentralisasi, Norma Baharu dan *Alternative Strategy* (DNA). Melalui pendekatan ini, pelaksanaan program tidak lagi hanya tertumpu di Kuala Lumpur, sebaliknya merentasi pelbagai negeri bagi membawakan seni kepada masyarakat, serta memfokuskan kepada penglibatan masyarakat itu sendiri dalam menghayati seni.
3. Antara program yang dilaksanakan adalah seperti Bakat Muda Sezaman 2021 – Seni Di Lokasi yang menekankan konsep karya seni di lokasi pilihan peserta masing-masing. Program *Rural Experiential Art Tourism* (Re-Art) dengan membawakan program-program bengkel dan pameran seni anjuran penggiat seni tempatan di kawasan-kawasan pedalaman juga telah dilaksanakan di Pahang, Johor dan Langkawi.
4. Penggunaan platform digital dimanfaatkan oleh Balai Seni Negara dalam membawakan program-program perkongsian dan pendidikan ketika tempoh pandemik ini. Portal *Go Gallery* dan *Provisual* telah diperkenalkan bagi penggiat seni berkongsi aktiviti dan karya masing-masing, selain daripada penganjuran siri webinar.

5. Di samping itu, program latihan keusahawanan seni “Young Art Entrepreneurs (YAE!)” juga turut dijalankan secara atas talian untuk melatih usahawan seni sepanjang tempoh pandemik ini.
6. Istana Budaya pula telah menganjurkan pengajaran dan pembelajaran muzik secara digital bagi mengatasi kekangan pergerakan dan limitasi jarak yang menghalang aktiviti pengajaran, latihan dan persembahan dilaksanakan agar industri seni muzik terus berjalan selaras dengan perkembangan digitilisasi yang memungkinkan capaian lebih mudah dan menyeluruh.
7. Walaupun tidak beroperasi sepanjang pelaksanaan Perintah Kawalan Pergerakan (PKP), Jabatan Muzium Malaysia (JMM) telah mempergiatkan program perkongsian ilmu dan pendidikan berteraskan sejarah, budaya serta alam semula jadi negara. Penganjuran pertandingan, kuiz dan sebagainya dilaksanakan secara dalam talian. Antara program yang berjaya dilaksanakan termasuk Tanya Kurator (22 siri), Wacana Muzium Diraja (33 siri), Webinar Kemerdekaan (4 siri), Majlis Pelancaran Sambutan Hari Muzium Antarabangsa 2021, dan Pertandingan Rekabentuk Muzium.
8. Selain itu, pameran maya diadakan dengan kolaborasi muzium-muzium negeri dan institusi bersempena Sambutan Hari Muzium Antarabangsa 2021. Pameran berbentuk 360 darjah dilaksanakan antaranya *The Lost Kingdom*, Kuasa Emas, Wayang Kulit Nusantara: Simbolisme di Sebalik Layar, Tenung Songket ASEAN, Gambus Serantau dan Chetti Wajah-wajah Malaysia. Untuk makluman, Muzium Kota Kayang di bawah seliaan JMM kini boleh dilawati secara maya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS TAHUN 2021**

---

**PERTANYAAN : LISAN**

**DARIPADA : DATUK SERI PANGLIMA HAJAH  
AZIZAH BINTI DATUK SERI PANGLIMA  
HAJI MOHD [BEAUFORT]**

**TARIKH : 27 OKTOBER 2021 (RABU)**

**SOALAN**

**Datuk Seri Panglima Hajah Azizah Binti Datuk Seri Panglima Haji Mohd Dun [Beaufort] minta MENTERI PERTANIAN DAN INDUSTRI MAKANAN menyatakan:**

- a. Apakah pelan cadangan Kementerian untuk melibatkan kerjasama yang jitu dengan Kerajaan Negeri Sabah bagi membangunkan kawasan-kawasan pengeluaran makanan; dan
- b. Adakah Kementerian sudah mengenalpasti tempat atau daerah yang akan dibangunkan.

**JAWAPAN:**

**Tuan Yang Di- Pertua,**

Untuk makluman Ahli Yang Berhormat, Kementerian Pertanian dan Industri Makanan (MAFI) telah membentuk kerjasama dengan Kerajaan Negeri Sabah dalam membangunkan kawasan-kawasan pengeluaran makanan di negeri Sabah melalui pelbagai platform sedia ada. Antaranya, melalui mesyuarat berkala antara YB Menteri MAFI dengan Exco-Exco Pertanian Negeri yang dihadiri YB Menteri Pertanian dan Perikanan Sabah (MAF Sabah), serta kerjasama antara Jabatan dan Agensi di bawah MAFI bersama MAF Sabah.

Pembangunan kawasan pengeluaran makanan di Sabah telah dilaksanakan melalui peruntukan pembangunan Rancangan Malaysia Lima Tahun bermula pada tahun 2006 melalui program Taman Kekal Pengeluaran Makanan (TKPM). Program ini dilaksanakan melalui kerjasama Kerajaan Persekutuan dan Kerajaan Negeri Sabah dan akan terus dipergiatkan dalam Rancangan Malaysia Kedua Belas (RMKe-12).

Dari segi perancangan kawasan pengeluaran makanan, lima (5) buah TKPM dengan keluasan keseluruhan sebanyak 508 hektar telah dikenalpasti untuk dibangunkan. TKPM tersebut termasuk TKPM Sg. Koyah, Kinabatangan Fasa 2 (80 hektar), TKPM Limbuak Banggi Kudat (100 hektar), TKPM Ulu Bole Sipitang (200 hektar), Mini TKPM Ulu Bongawan (28 hektar) dan TKPM Serudong, Kalabakan (100 hektar).

Selain itu, MAF Sabah melalui Jabatan Pertanian Sabah juga merancang untuk menjadikan Keningau sebagai "*Fruit Valley of Sabah*" melalui pewujudan TKPM Apin-Apin Keningau pada tahun 2022 dengan permohonan peruntukan sebanyak RM2.5 juta. TKPM ini akan menumpukan kepada aktiviti pengeluaran buah-buahan jenis jangka masa singkat dan bernilai tinggi seperti tembikai dan tembikai susu serta penanaman nanas MD2 yang akan matang dalam tempoh 12 bulan ke 14 bulan. Tanaman ini mempunyai permintaan tinggi di pasaran tempatan dan negara Brunei.

Selain daripada Program TKPM, Jabatan Pertanian Sabah juga melaksanakan Program Pembangunan Komoditi Tanaman melibatkan sayur-sayuran dan buah-buahan bernilai tinggi seperti durian, kelapa dan kopi. Pelaksanaan program ini menyasarkan beberapa daerah di seluruh Sabah tertakluk kepada peruntukan yang diluluskan.

Kolaborasi bersama Kerajaan Negeri Sabah akan terus diberikan tumpuan dan fokus oleh Kerajaan Persekutuan melalui MAFI dalam meningkatkan kemampuan pengeluaran makanan tempatan melalui pelbagai strategi yang digariskan dalam Rancangan Malaysia Lima Tahun dan Dasar Agromakanan Negara 2021-2030 (DAN 2.0).

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
(SEKIJANG)**

**TARIKH : 27 OKTOBER 2021 (RABU)**

**SOALAN**

**PUAN HAJAH NATRAH BINTI ISMAIL** minta **MENTERI KANAN PENDIDIKAN** menyatakan jumlah sekolah menengah yang didaftarkan di Kementerian berbanding dengan jumlah sekolah rendah sedia ada dan adakah jumlah sekolah menengah yang sedia ada ini mencukupi untuk menampung jumlah pelajar sekolah menengah di seluruh negara.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Berdasarkan rekod KPM, sehingga 25 Oktober 2021 bilangan sekolah yang berdaftar dengan KPM adalah sebanyak 10,751. Daripada jumlah tersebut, 2,448 sekolah menengah dan 7,780 sekolah rendah yang di bawah KPM manakala 523 buah sekolah merupakan sekolah swasta iaitu 391 adalah sekolah menengah dan 132 adalah sekolah rendah. Jumlah sekolah menengah ini merangkumi sekolah harian biasa dan sekolah khusus seperti kolej vokasional, sekolah berasrama penuh, sekolah menengah teknik, sekolah menengah pendidikan khas, Sekolah Sukan Malaysia, Sekolah Seni

Malaysia, sekolah menengah kebangsaan agama dan Sekolah Bimbingan Jalinan Kasih.

Untuk makluman Ahli Yang Berhormat, KPM menyedari wujud kesesakan di beberapa kawasan disebabkan pertambahan kepadatan penduduk. Sehubungan itu, KPM secara berterusan akan memastikan kesesakan murid di satu-satu kawasan dapat ditangani dengan pembinaan bangunan tambahan dan sekolah baharu. Secara umumnya, KPM akan melaksanakan analisis keperluan dengan mengambil kira kesediaan tapak, bilangan dan kapasiti sekolah sedia ada yang berhampiran, kepadatan penduduk di kawasan sekitar, liputan kawasan tadahan penduduk (*catchment area*) serta perancangan pembangunan kawasan tersebut.

Pada masa ini, sebanyak 91 projek pembinaan sekolah menengah baharu sedang dalam proses pembinaan. KPM juga telah mengemukakan permohonan untuk membina 9 buah sekolah menengah baharu dalam RMKe-12 *Rolling Plan* 2 tahun 2022. Permohonan ini masih dalam pertimbangan pihak agensi pusat dan kelulusan adalah tertakluk kepada keutamaan dan kedudukan kewangan semasa kerajaan.

Dengan pembinaan sekolah menengah baharu tersebut, ianya akan dapat menampung jumlah murid sekolah menengah di seluruh negara.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM TZE TZIN [ BAYAN BARU ]**

**TARIKH : 27 OKTOBER 2021 (RABU)**

**SOALAN**

Minta **MENTERI PERTANIAN DAN INDUSTRI MAKANAN** menyatakan tindakan Kerajaan terhadap kenaikan harga barangan input pertanian seperti racun dan baja yang naik melebihi 100%. Apakah tindakan kawalan terhadap racun haram yang berleluasa akibat harga racun sah yang mahal.

**JAWAPAN:**

**Tuan Yang Di Pertua,**

Untuk makluman Ahli Yang Berhormat, MAFI sentiasa bekerjasama dengan Kementerian Perdagangan Dalam Negeri dan Hal Ehwal Pengguna (KPDNHEP) bagi mencari penyelesaian jangka panjang dalam mengatasi kenaikan harga barang input pertanian.

Akta Racun Makhluk Perosak 1974 [*Akta 149*] merupakan suatu akta yang dikuatkuasakan oleh Jabatan Pertanian (DOA) melalui Lembaga Racun Makhluk Perosak. Akta 149 ini mengawalselia industri racun makhluk perosak melalui pendaftaran, perlesenan dan penguatkuasaan penggunaan racun untuk kawalan makhluk perosak. Semua racun makhluk perosak sama ada dikilangkan di Malaysia atau diimport dari luar negara perlu didaftarkan terlebih dahulu dengan Lembaga Racun Makhluk Perosak sebelum boleh dijual dan digunakan.

Racun haram adalah racun makhluk perosak yang telah diharamkan di Malaysia dan tiada sebarang aktiviti melibatkan racun tersebut dibenarkan di Malaysia termasuk, mengimport, mengilang, menjual dan menggunakannya manakala racun tidak sah adalah racun yang tidak berdaftar atau tidak mematuhi syarat-syarat yang ditetapkan oleh Lembaga Racun Makhluk Perosak. Semua premis yang menjual racun atau menyimpan racun untuk dijual perlu mempunyai lesen menjual atau menyimpan untuk dijual racun makhluk perosak yang dikeluarkan oleh Lembaga Racun Makhluk Perosak setelah melalui pemeriksaan premis oleh pegawai Bahagian Kawalan Racun Makhluk Perosak dan Baja, Jabatan Pertanian. Mana-mana individu atau premis yang mengguna, menjual atau memiliki racun makhluk perosak haram atau tidak sah boleh didakwa di bawah subseksyen 20 (3) dan seksyen 53A Akta 149. Hukuman bagi kesalahan tersebut adalah penjara selama setahun atau denda tidak kurang daripada RM 10,000.

Sejak Januari sehingga September 2021, sebanyak 350 pemeriksaan premis telah dijalankan oleh pegawai penguatkuasa Racun Makhluk Perosak dan sebanyak 36 rampasan racun tidak sah

### **SOALAN NO: 33**

dan racun haram telah dilakukan. Pemeriksaan dan pemantauan racun tidak sah dan haram ini bukan sahaja dijalankan ke atas premis-premis racun tetapi juga di ladang-ladang petani melalui pensampelan dan analisa makmal. Bagi tahun 2021, sebanyak 167 sampel telah dianalisa dan 44 sampel telah dikesan menggunakan racun haram atau racun tidak sah.

Selain daripada pemeriksaan premis dan ladang, DOA juga bekerjasama dengan agensi-agensi penguatkuasa yang lain seperti Jabatan Perkhidmatan Kuarantin dan Pemeriksaan Malaysia (MAQIS), KPDNHEP dan Polis Diraja Malaysia (PDRM) dalam mengekang penipuan, pemalsuan dan penyeludupan racun-racun makhluk perosak. Jabatan juga menyediakan talian hotline, emel dan kaunter aduan pelanggan di setiap pejabat DOA bagi membolehkan mana-mana pihak membuat aduan berhubung penggunaan dan penjualan racun haram atau racun tidak sah di pasaran supaya siasatan dan tindakan penguatkuasaan dapat diambil dengan kadar segera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN M. KULASEGARAN (IPOH BARAT)**

**TARIKH : 27 OKTOBER 2021 (RABU)**

**SOALAN**

**TUAN M. KULASEGARAN** minta **MENTERI KANAN PENDIDIKAN** menyatakan usaha dan rancangan yang akan diambil oleh kementerian pendidikan untuk menyelesaikan masalah kekurangan Guru Bahasa Tamil di Sekolah Menengah di mana terdapat lebih daripada 85 orang guru terlatih dari Universiti Perguruan Sultan Idris yang belum mendapat penempatan sejak tahun 2018.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa komited dalam memastikan pengisian guru di sekolah adalah berdasarkan kepada keperluan dan kekosongan jawatan mengikut opsyen yang ditetapkan.

Untuk makluman Ahli Yang Berhormat, kedudukan guru mengikut kelulusan norma perjawatan pada 13 Oktober 2021 menunjukkan keperluan guru mata pelajaran Bahasa Tamil di sekolah menengah ialah seramai 624 orang. Buat masa ini, keperluan bagi guru opsyen Bahasa Tamil untuk sekolah menengah ini telah diisi sepenuhnya. Oleh yang demikian, KPM tidak mempunyai perancangan untuk melantik guru opsyen Bahasa Tamil yang baharu.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM TZE TZIN [BAYAN BARU]**

**TARIKH : 27 OKTOBER 2021 (RABU)**

**SOALAN**

**TUAN SIM TZE TZIN [ BAYAN BARU ]** minta **MENTERI PERTANIAN DAN INDUSTRI MAKANAN** menyatakan berapakah jumlah nelayan dan peratusan yang telah mencarum PERKESO NELAYAN dan apakah syarat dan butiran program ini. Adakah program PERKESO ini akan diperluaskan ke sektor pertanian lain.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Skim Keselamatan Sosial Pekerjaan Sendiri (SKSPS) oleh PERKESO merupakan salah satu inisiatif di bawah Skim Perlindungan Keselamatan Nelayan Lembaga Kemajuan Ikan Malaysia (LKIM) di bawah Akta Keselamatan Sosial Pekerjaan Sendiri 2017. Skim ini memberikan perlindungan kepada orang berinsuran bekerja sendiri daripada bencana pekerjaan dan kemalangan semasa menjalankan aktiviti pekerjaan.

Syarat kelayakan bagi mencarum di bawah SKSPS ini ada dua (2) iaitu:

- a) Warganegara Malaysia/pemastautin tetap tanpa mengira had umur; dan
- b) Individu yang menjalankan aktiviti pekerjaan sendiri untuk mencari nafkah.

Sehingga berakhir September 2021, sejumlah 35,238 orang nelayan aktif yang juga merupakan penerima Elaun Sara Hidup Nelayan (ESHN) telah mencarum di bawah SKSPS ini dengan nilai bayaran sejumlah RM5.5 juta. Skim ini adalah terbuka kepada semua golongan nelayan yang berdaftar. Bagi penerima ESHN, caruman akan dilaksanakan melalui pemotongan bayaran secara tahunan berjumlah RM157.20. Manakala bagi nelayan yang tidak menerima ESHN, mereka juga boleh membuat caruman sendiri secara sukarela ke Pejabat PERKESO.

Sekian, terima kasih



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI DR. WAN AZIZAH WAN ISMAIL  
[ PANDAN ]**

**TARIKH : 27 OKTOBER 2021 (RABU)**

**SOALAN**

Minta **MENTERI PERTANIAN DAN INDUSTRI MAKANAN**  
menyatakan :-

- a) berapa bilangan terkini yang terlibat dengan program pertanian bandar; dan
- b) apakah usaha yang telah dan akan dilakukan bagi menggalakkan lebih ramai menceburi pertanian bandar terutama golongan B40.

**JAWAPAN**

**Tuan Yang Di Pertua,**

Untuk makluman Ahli Yang Berhormat, Kementerian Pertanian dan Industri Makanan (MAFI) melalui Jabatan Pertanian (DOA) telah menjalankan Program Pertanian Bandar atau Program Kebuniti bagi membantu penduduk bandar dan pinggir bandar untuk mengurangkan kos sara hidup menerusi aktiviti pertanian dalam meningkatkan hasil tanaman makanan di kawasan bandar dan pinggir.

Sepanjang pelaksanaan Program Pertanian Bandar bermula pada tahun 2014 sehingga 2020, seramai 165,207 orang peserta dari 22,385 lokasi seluruh negeri Semenanjung Malaysia termasuk Sabah, Sarawak dan Wilayah Persekutuan Labuan telah menerima manfaat dengan jumlah peruntukan sebanyak RM 64.82 juta. Jumlah peserta tersebut melibatkan 47,938 individu, 42,482 komuniti, 23,135 institusi dan 51,652 sekolah.

Susulan daripada kejayaan pelaksanaan Program Pertanian Bandar, kerajaan telah memperuntukkan sebanyak RM10 juta di bawah Pelan Jana Semula Ekonomi Negara (PENJANA) pada tahun 2020 bagi membantu penduduk bandar dan pinggir bandar yang terkesan dengan penularan wabak pandemik COVID-19. Peruntukan ini telah memberi manfaat kepada 23,104 orang membabitkan 16,405 lokasi di seluruh Malaysia. Sambutan yang menggalakkan daripada masyarakat telah mendorong kerajaan untuk memberi tambahan peruntukan sebanyak RM30 juta bagi Program Pertanian Bandar pada tahun 2021. Peruntukan tambahan ini telah memberi manfaat kepada 39,608 orang melibatkan 25,775 lokasi di seluruh Malaysia.

Bagi menyokong kesinambungan Program Pertanian Bandar ini, Kerajaan juga telah meluluskan sebanyak RM 50 Juta di bawah RMKe-12 untuk tempoh selama 5 tahun. Antara bantuan/insentif yang diberikan di bawah program ini adalah:

- a) Bahan input (Baja, Biji Benih, Media tanaman – tanah campuran, sabut kelapa, *peatmoss*);
- b) Peralatan kecil pertanian (*planter box*/ bag, pasu, peralatan kecil-*gardening tools*, cangkul, *secateurs* dan lain-lain); dan
- c) Sistem tanaman tanpa tanah - Hidroponik (Sistem Fertigasi Titis, Sistem Nutrient *Film Technique (NFT)*, sistem *Deep Flow Technique (DFT)* yang menggunakan panel solar.

## SOALAN NO : 36

Dalam hal ini, bagi menggalakkan lebih ramai menceburi bidang pertanian bandar terutama golongan B40, Jabatan Pertanian (DOA) telah mengambil beberapa pendekatan seperti berikut:-

- a) Pelaksanaan Program Pertanian Bandar di bawah Dasar Komuniti Negara (DKOMN) telah dimulakan sejak awal tahun 2019 di mana program ini telah dilaksanakan di Projek Perumahan Rakyat (PPR) di bawah KPKT di seluruh negara;
- b) Menjalankan promosi aktiviti-aktiviti pertanian bandar melalui media massa dan media sosial seperti Facebook dan Youtube;
- c) Memberi pendedahan awalan konsep pertanian bandar dalam kalangan pelajar sekolah dan penuntut di institusi pengajian tinggi;
- d) Menjalinkan kerjasama strategik dengan agensi berkaitan dalam mempelbagaikan teknologi dan kaedah pertanian bandar untuk disesuaikan dengan persekitaran di bandar;
- e) Menggalakan program mentor - mentee antara mereka yang sudah berjaya melaksanakan program pertanian bandar dengan mereka yang baharu ingin menceburi pertanian bandar juga akan dilaksanakan; dan
- f) Menggalakan aktiviti tambah nilai seperti penghasilan kompos daripada sisa buangan pertanian bandar dan penghasilan produk Industri Asas Tani juga dilaksanakan bagi menjana pendapatan daripada aktiviti di sepanjang rantai nilai.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN LIM KIT SIANG [ ISKANDAR PUTERI ]**

**TARIKH : 27 OKTOBER 2021( RABU )**

**SOALAN**

**TUAN LIM KIT SIANG [ ISKANDAR PUTERI ]** minta **MENTERI PELANCONGAN, SENI DAN BUDAYA** menyatakan berapa banyakkah koleksi lukisan karyawan tempatan dan luar negara yang dimiliki oleh Balai Seni Lukis Negara yang tidak berada dalam mana-mana pameran untuk tempoh tiga tahun yang lepas.

**JAWAPAN**

**Tuan Yang di-Pertua,**

1. Sehingga 25 Oktober 2021, Lembaga Pembangunan Seni Visual Negara atau lebih dikenali sebagai Balai Seni Negara memiliki sebanyak 4,515 buah karya yang telah didaftarkan sebagai Koleksi Negara.
2. Daripada jumlah tersebut, sebanyak 4,085 buah karya tidak berada dalam mana-mana pameran bagi tahun 2018 sehingga tahun 2020. Jumlah ini meliputi 3,005 koleksi karya tempatan dan 1,080 karya antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HASAN BIN BAHROM  
[TAMPIN]**

**TARIKH : 27 OKTOBER 2021 (RABU)**

**SOALAN**

Minta **MENTERI PENGAJIAN TINGGI** menyatakan perkara yang berkaitan dengan pengajian TVET. Apakah fasiliti yang digunakan semasa pengajian selari dengan teknologi semasa dan adakah graduan mampu berdaya saing dengan pasaran tempatan mahupun global.

**JAWAPAN**

Tuan Yang di-Pertua,

Kementerian Pengajian Tinggi (KPT) sentiasa mengutamakan kemudahan yang kondusif berserta dengan penggunaan teknologi yang terkini bagi tujuan pengajaran dan pembelajaran (PdP) di Institusi Pendidikan Tinggi (IPT), termasuklah di politeknik dan kolej komuniti. Ini penting bagi memastikan fasiliti yang disediakan adalah relevan dengan teknologi semasa serta sesuai dengan bidang-bidang pengajian yang ditawarkan.

Dalam hubungan ini, pelbagai inisiatif telah dilaksanakan oleh KPT. Antaranya ialah:

- (i) **Menyediakan capaian lebar jalur di politeknik dan kolej komuniti.** Penyediaan ini mengambil kira jumlah pelajar dan pensyarah sedia ada dengan dengan kapasiti di antara 100 Mbps hingga 600 Mbps di setiap politeknik dan kolej komuniti. Kapasiti ini seterusnya akan dinaik taraf dari semasa ke semasa mengikut keperluan institusi;
- (ii) **Menyediakan akses program TVET yang berkualiti, lebih meluas dan diiktiraf.** Secara keseluruhannya, terdapat 536 program pengajian di peringkat sijil, diploma dan sarjana muda di politeknik dan kolej komuniti yang ditawarkan, mendapat pengiktirafan akreditasi dari Agensi Kelayakan Malaysia (MQA), serta badan-badan profesional seperti Lembaga Teknologis Malaysia (MBOT) dan Lembaga Jurutera Malaysia (BEM); dan
- (iii) **Memperkukuh tadbir urus dan penyelarasan inisiatif memperkasakan TVET merentasi Kementerian.** Dalam hubungan ini, Majlis TVET Negara yang terdiri daripada pelbagai pihak, termasuk wakil industri, telah ditubuhkan. MTVET berfungsi untuk memperhalusi isu-isu seperti ketidakselarasan tadbir urus TVET; kekurangan akses pelajar dan komuniti kepada program TVET; penggunaan fasiliti yang tidak optimum; kekurangan

kerjasama dan pengiktirafan daripada pihak industri; sumber pembiayaan pelajar yang terhad; penerimaan masyarakat yang rendah terhadap program TVET dan persepsi negatif ibu bapa terhadap peluang kerjaya bidang TVET.

Dari aspek daya saing pula, Laporan Kajian Pengesanan Graduan bagi tahun 2020 yang dilaksanakan oleh KPT merekodkan kadar kebolehpasaran graduan politeknik sebanyak 91.4 peratus sementara kolej komuniti 94.2 peratus. Ini membuktikan dengan jelas bahawa graduan politeknik dan kolej komuniti mendapat permintaan yang tinggi oleh industri.

Dalam perkara yang berkaitan juga, graduan politeknik dilihat mampu berdaya saing di peringkat antarabangsa berdasarkan beberapa siri kejayaan pelajar dalam program dan pertandingan di peringkat antarabangsa seperti program Robocon. Malah, Politeknik turut mendapat pengiktirafan antarabangsa seperti *Asia Pacific Accreditation and Certification Commission* (APACC) atas penawaran program TVET seperti program kejuruteraan dan teknologi kejuruteraan yang diiktiraf melalui akreditasi daripada Lembaga Jurutera Malaysia. Perkara ini turut membawa kepada pengiktirafan Sydney Accord dan Dublin Accord yang membolehkan graduan politeknik diterima untuk bekerja di negara-negara berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB TUAN SYED IBRAHIM BIN SYED NOH  
(LEDANG)**

**TARIKH : 27 OKTOBER 2021 (RABU)**

**SOALAN**

**TUAN SYED IBRAHIM BIN SYED NOH [ LEDANG ]** minta **MENTERI PENGANGKUTAN** menyatakan respon Kerajaan dalam menguruskan krisis antarabangsa melibatkan tindakan Lapangan Terbang dan Penyedia Perkhidmatan Navigasi Udara (ANSP) menaikkan caj yang akan membebaskan pemulihan industri penerbangan.



**JAWAPAN**

**Tuan Yang di-Pertua,**

Susulan impak COVID-19, sektor pelancongan dan penerbangan terkesan dan mengalami ketidaktentuan pasaran yang meningkatkan lagi risiko sedia ada yang membebankan industri penerbangan. Kesan penularan wabak Covid-19 terhadap ekonomi dunia dan negara, terutamanya aspek perubahan corak permintaan pelancong dan sektor penerbangan memerlukan satu tempoh pemulihan yang dijangka memakan masa selama 3 hingga 4 tahun lagi tertakluk kepada situasi semasa penularan wabak tersebut di dalam dan luar negara. Suruhanjaya Penerbangan Malaysia (MAVCOM) menjangkakan penguncupan trafik penumpang udara antara 77.0 peratus dan 80.2 peratus tahun ke tahun, yang diterjemahkan kepada 5.3 juta hingga 6.1 juta penumpang bagi tahun 2021.

Bagi mengurangkan impak kewangan yang membebankan kepada industri penerbangan awam negara semasa fasa pemulihan ekonomi, Pihak Berkuasa Penerbangan Awam Malaysia (CAAM) dan Suruhanjaya Penerbangan Awam (MAVCOM) sedang melaksanakan kajian jangka panjang yang menyeluruh berkenaan caj perkhidmatan penerbangan yang lebih kompetitif mengambil kira keadaan semasa.

Kajian-kajian fi dan caj yang berkaitan adalah berhubung fi dan caj bagi perkhidmatan navigasi udara yang disediakan oleh CAAM dan caj perkhidmatan penumpang (*passenger service charges*), caj pendaratan di lapangan terbang, serta caj-caj yang termasuk dalam Peraturan-Peraturan Suruhanjaya Penerbangan Malaysia (Caj Perkhidmatan Penerbangan) 2016 oleh MAVCOM. Kedua-dua kajian dijangka akan selesai antara Disember 2021 sehingga Mac 2022.

Kementerian Pengangkutan bersama-sama dengan CAAM dan MAVCOM akan meneliti dapatan kajian tersebut dan mengadakan sesi libat urus dengan semua pemain industri penerbangan dalam memastikan fi dan caj yang dikenakan adalah kompetitif.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KE-14**

**PERTANYAAN : LISAN**  
**DARIPADA : TUAN KHALID BIN ABD SAMAD**  
**[SHAH ALAM]**  
**TARIKH : 27 OKTOBER 2021 (RABU)**

**SOALAN**

**TUAN KHALID BIN ABD SAMAD [ SHAH ALAM ]** minta **MENTERI KEWANGAN** menyatakan apakah justifikasi dan rasional Kerajaan dalam mengekalkan windfall tax ke atas industri kelapa sawit namun tidak ke atas sektor perbankan dan pembuatan sarung tangan sebagai contoh.

**JAWAPAN**

Tuan Yang di-Pertua,

1. Untuk makluman Ahli Yang Berhormat, levi keuntungan luar biasa masih lagi dikenakan ke atas pengeluaran buah tandan segar kelapa sawit memandangkan harga komoditi minyak sawit adalah stabil dan tidak terkesan dengan kitaran ekonomi. Levi hanya dikenakan apabila harga purata minyak sawit mentah mencapai nilai ambang 2,500 ringgit se tan di Semenanjung dan 3,000 se tan di Sabah dan Sarawak. Levi tidak dikenakan apabila harga minyak sawit mentah berada di bawah paras nilai ambang tersebut. Di samping itu, pekebun kecil yang memiliki kebun berkeluasan kurang daripada 100 ekar juga adalah dikecualikan daripada bayaran levi.
2. Kerajaan tidak berhasrat untuk mengenakan levi keuntungan luar biasa ke atas barangan pengilangan tempatan seperti pembuatan sarung tangan. Ini adalah kerana levi hanya dikenakan ke atas amaun untung yang melebihi nilai ambang tertentu. Barangan siap pengguna seperti

sarung tangan getah, mempunyai pelbagai jenis, standard, spesifikasi serta gred yang berbeza-beza mengikut permintaan pasaran. Oleh itu, adalah sukar untuk menentukan harga pasaran yang seragam bagi barangan pengilangan dan nilai ambang yang berkaitan.

3. Walaupun tidak dikenakan levi keuntungan luar biasa, syarikat-syarikat sarung tangan getah telah menyumbang sebanyak RM490 juta kepada Kerajaan pada tahun 2020 bagi membantu usaha Kerajaan menangani krisis pandemik COVID-19. Ini adalah sebagai tambahan kepada cukai pendapatan korporat mereka pada kadar tertinggi 24% yang dikenakan.

4. Pengenaan levi keuntungan luar biasa ke atas sektor perkhidmatan seperti perbankan atau lain-lain jenis perkhidmatan pula adalah tidak selaras dengan Akta Levi Keuntungan Luar Biasa 1998. Ini adalah kerana levi hanya dikenakan ke atas amaun untung yang melebihi nilai ambang tertentu bagi pengeluaran sesuatu barang yang ditetapkan dan bukannya ke atas sesuatu perkhidmatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN TERESA KOK SUH SIM [ SEPUTEH ]**

**TARIKH : 27 OKTOBER 2021 (RABU)**

**SOALAN**

**PUAN TERESA KOK SUH SIM [ SEPUTEH ]** minta **MENTERI TENAGA DAN SUMBER ASLI** menyatakan apakah tindakan susulan untuk mendapatkan insentif kewangan selepas mendaftarkan 97,470,000 tan CO<sub>2</sub> pengurangan perlepasan gas rumah hijau di platform REDD-plus di bawah Kerangka Konvensyen Perubahan Iklim Pertubuhan Bangsa-bangsa Bersatu.

**JAWAPAN**

Tuan Yang di-Pertua,

1. Malaysia telah mendaftarkan sebanyak 97.47 juta tan CO<sub>2</sub> sebagai kredit karbon di *UNFCCC REDD+ Web Platform* bagi tempoh 2006 hingga 2010. Kredit karbon yang didaftarkan telah memenuhi syarat-syarat yang ditetapkan oleh Kerangka Konvensyen Perubahan Iklim Pertubuhan Bangsa-Bangsa Bersatu (UNFCCC) serta diiktiraf di peringkat antarabangsa. Melalui inisiatif ini, mana-mana pihak termasuk organisasi dan syarikat-syarikat swasta yang berminat boleh membeli kredit karbon yang telah didaftarkan di platform berkenaan.

2. Kerajaan sedar bahawa usaha pengekalan dan pemuliharaan hutan di negara ini memerlukan dana yang sangat besar. Sehubungan itu, Kementerian Tenaga dan Sumber Asli (KeTSA) sedang membangunkan Kerangka Kewangan REDD Plus (*REDD Plus Finance Framework* - RFF) bertujuan untuk menjana sumber kewangan melalui transaksi pasaran karbon hutan (*forest carbon market*) bagi membiayai usaha pengekalan, pengurusan, perlindungan dan pemuliharaan hutan secara berterusan yang dilaksanakan oleh Kerajaan-Kerajaan Negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN YEO BEE YIN [BAKRI]**

**TARIKH : 27 OKTOBER 2021 (RABU)**

**SOALAN**

**PUAN YEO BEE YIN [BAKRI]** minta **MENTERI TENAGA DAN SUMBER ASLI** menyatakan perkembangan tentang pendrafan dan pembentangan Akta Kecekapan dan Konservasi Negara.

**JAWAPAN**

Tuan Yang di-Pertua,

1. Kementerian Tenaga dan Sumber Asli (KeTSA) sedang menggubal Rang Undang-undang Kecekapan dan Konservasi Tenaga sebagai kerangka perundangan untuk mengawal selia dan menyokong pelaksanaan inisiatif kecekapan tenaga secara menyeluruh khususnya untuk pengguna elektrik berintensiti tinggi dalam sektor industri dan komersial.
2. Pada masa ini, draf Rang Undang-undang Kecekapan dan Konservasi Tenaga sedang dalam peringkat semakan akhir di peringkat Jabatan Peguam Negara (AGC). Rang Undang-undang Kecekapan dan Konservasi Tenaga dijangka akan dikemukakan untuk bacaan kali pertama di Parlimen pada tahun 2022.

Sekian, terima kasih.